

四庫全書

集部

欽定四庫全書

集部

泰泉集卷一至三

詳校官給事中臣王鍾健

中書_臣劉源溥覆勘

覆校官中書_臣宋銘

校對官學正_臣湯垣

謄錄監生_臣王寶唐

欽定四庫全書

集部六

泰泉集

別集類五

明

提要

臣等謹案泰泉集十卷明黃佐撰佐字才伯
香山人正德辛巳進士改庶吉士授編修出
為江西廣西按察司僉事召入為左司諫歷
官至少詹事兼翰林學士為忌者所劾罷卒
贈禮部右侍郎謚文裕事蹟具明史文苑傳

佐少以奇雋知名及官翰林明習掌故博綜
今古於經濟理學尤為究心嘗與王守仁辨
知行合一之旨多所闡發生平著述至二百
六十餘卷所撰如樂典革除遺事諸書今俱
已別著於錄此集刻於嘉興乃其為司成以
前之所作也佐才力博瞻摘詞揆藻足以雄
視一時海內亦奉為壇坫嶺南自南園五子
以後風雅中墜至佐始力為提倡如梁有譽

黎民表等皆其弟子廣中文學復盛論者稱
佐有起衰救弊之功其詩吐屬冲和頗見研
練朱彞尊謂其取材太陳故格雖聳高而氣
少奔逸然在茶陵宗派消歇之餘七子議論
方興之會獨能力追正始不失雅音猶為不
惑於岐趨者焉至其春夜大醉言志詩落句
有云倦游却憶少年事笑擁如花歌落梅此
不過嘲風弄月之詞自注乃以欲盡理還為

喻強附道學實為迂鑿無當王世貞謂此乃
佐為美官講學恐人得而持之故有此語當
得其情然究不免通人之蔽矣乾隆四十二
年九月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

泰泉集卷一

明 黃佐 撰

賦

乾清宮賦

丕鐸維明帝睠鴻德通寧宸區烈祖受之宅離作都秉
粹精以靈承握隆禧之昌符文皇振業依黜羸而奠辰
樞繚瀛廓宮肇此天居粵乾清之祕宮揔元黃之噴薄
何富媪之蘊靈竢定鼎而後獲泊龜謀之襲契灋太紫

以營啟蓋以䟽明淪聰儲神習體軼煩惱而游冲漠者也稽諸邃古合宮總期黃虞之始經營而成周路寢之所儀九筵五雉於皇拓之既普而深亦麗且彌匪維宴娛日監在茲湫漭霄霓之中於以敬陟降而崇緝熙建休號以詒燕謀蓋亦已百有餘朞矣越闕逢闕茂之歲赤牒章怒鬱攸孔震結構逢涌氛祲徹旻豈極人之嫁雪將弗舊而布新詔司空而僞工走羣靈而驅八神斲石則無間不周之岷掄材則荆揚岷峨之阻輓修綽則

山善稠叢伐輪困則雷聞邪許驥駢駢礚淫淫與與揮
汗為瀦焚日成暑陶埴鍛厲之屬莫不飭分其曹伍於
是乎揆日畧驗星文陳圭臬絜廣輪宗伯獻模林衡效
勤礮聲歟岳鍾徒篳雲優人司堅匠慶揮斤約築削屢
子來以趣役者虎躍而霆奔既乃考工畧計以萬雕摩
維精賁輪飾矣絢然陽化爍爾陰泮紋真巧於大鈞雖
鬼神其猶憚故其為狀也豐融曼衍揭摩崢嶸縵縵莫
莫膠流交嬰邈旁隆以閎壯亘砢磷而靖冥敞故赫以

歲硯條康食而齋停茗堯于天漢紛攢羅而混成瓌
殊俶儻不可殫形况今忽今撒膠葛騰九閎接耀魄之
威神幹璇璣而緯高明羗跼蹐以輶蹇魂悚悚其若驚
爾乃登泰階之三重遵軌涂之盤曲鉤陳縱縱以匡衛
閣道駸駸而延屬邛而詹之若燭龍之蜿蜒引扶光而
曠若木頰而履之若巨鰲之負運九垓而苞百谷圉
殿般般以離立珠煥黃黃以相燭函網緼之元氣又何有
乎慘黷彼曾城與縣圃昔傳聞而今駭瞞其上則觚稜

高標金爵翹翹琉璃鱗鱗畫霓摩霄織烏顧兔出沒扶
搖屹華表以縈旬始莅颺擻乎斗杓簷牙翔而阿雷奮
絕浮景而翻碧寥其下則釳砌瑤礎右平左礧承以峻
基廣以夷石盤以蛟螭塗以朱碧翠若崑崙鎮奠南極
窮方繒綾磴磴即即其中則繇繇房植眈眈層覆梅梁
揭宇藻井承漏搏櫨櫺林修椳曲校飛枕浮柱支撐環
句題鄂衝蕤以霞張栢棟嬋姁而電糾傍天矯以紺間
澶沛艾以赳螭上翫麗以互經下舛歛而騰湊玉繩倚

扼於輿宿瑤光燦朗於寗牖轉根度闕蠖略鴻溶網戶
翠錢金鋪瑣窻五采爭勝流煙走虹壁門洞開璀璨玲
瓏流蘇縣璫招搖從風丈鏡曲瓊煒煒雍雍鼉采夜光
之飾與灝氣而相通詖蕩蕩以穹豁忽眇眇而冥濛窳
五城而張六幕終紛負而莫窮其外則輦路纏連繚垣
周迴複道遐阪達於平臺元厲黃碾間以玫瑰茱萸蔥
蒨垂楊大懷永巷迤邐是為揔街乃顧二門業業將將
日精月華左右相望鬱儀望舒駐轡而驤重闌逾延開

闔陰陽試舉其名則維百福與千祥杳騁驚以寧窳賸
步欄而攀天梁東望文華蒼龍守闔上憲攝提析木之
津啓搖山之碧鏤蹠荔丘之寶輪丹府甲觀圖書萃珍
扈閣閒館昱爚嶙峋西望武英金虎環陞象彼觜觿衡
石積層牙璋葆旅戔動雷厲蒿室蘭塘截巢迢遰掖垣
之外周廬宿衛於前則華蓋謹身通於奉天寔應泰壹
文昌太微三光之廷帝車運衡合契軒轅鶉光溥照燁
燁在馬垂拱中宸恭默如淵於後則坤寧噦噦含貞符

矩位正玄枵星躔婺女抗虹扶棟鑒翠開節四榮雲謁
萬拱菱杼玉卮金釭鵬騫鳳舉儷我宸極以為內主若
迺仁壽清寧問安承顏黜于黃祗倬彼玄間彼昭德興
泰長春百花諸宇則又儲靡曼而列幽間衝風颺乎闕
幙散或或之椒蘭紅繡績與機杼儼河鼓之天孫函菱
蒔以晞日珎瑤戛乎珊珊爰設六尚以掌九室冠袍鞞
鞞其儀有似彤瑁煒煌伊達斯弼叙燕寢之條紀恒授
環而戒逸銘槃鑑以昭警司精微於密勿爾迺煖殿弘

敞青軒彤墀帳設甲乙翠被絳旒霍落簾櫳晝罽毼
循除而架有篴有簫盡頂重櫺槎牙巖旒方亭曲榭獸
鑰陔陟歷夫欽安仁智乃瞰百子之池游儵澗潏汎淡
連漪鳴鳬翔鵠頡頏栖遲植芭蕉與芙蓉靈囿莽乎萋
萋監宮鶴立以企幸賊糾幄而矚龍旗黃衣有徒洒埽
供事儀文璚綬以及樞駟監局之號二十有四銀瑤珥
貂時維閭寺挈壺之設于彼外閨蓮燈虬漏貯水運機
偶神按候與天弗違鴈沼鵲樓黎旭熹微鼓登析應雞

人嘒旦蟲飛而會盈燎輝而色辨天子乃駕鸞蓋鏗鯨
鍾清黃道出紫宮端門載啓執法當中左掖右掖星共
雲從羽林森森而就次旄頭髯若其蒙茸自三能而逮
郎位莫不矢心於重瞳明庭景晷玉未遑食庶采既臚
乃還宮而定息猶糾虔乎天刑夕惕厲乎衮職守琬琰之
彝章鋪鴻藻而立極誕茲宮之成也聖神聿興時維綴
旒信帝心之簡在用迓德而彰景休皇輿發迹乎郢甸
鳴玉鸞之啾啾歌斯干以考室非鬼神而孰謀軫民役

之勞疾印先后之懿猷蓋奕奕欵欵執執如也於是帝
幕宵縣緹帷宿設雲構呀赫登降詘折龍超虎視遠瞪
近矚披撿奇妙規矩相汁神移天運俞哉匠哲覓牢籠
乎宇宙挹三宸而可擷山川瑣尾而在下九野硜硜而
昭晰威靈旁魄而四塞規萬世而妥洪業乃念宣廟圖
揭幽風稼穡艱難景阜心融乃念敬考調元習靜光祚
思賢永言顯聖是以服閑邪之炯戒體慎獨之徽言追
往初之遐躅襲得一之自然日出王與游行恒對越乎

昊天昧爽兢兢而練要蓋冥心乎馮翼之先於是乎草
批政尚仁厚興禮樂韜甲冑振幽滯揚側陋咨九扈禮
三壽乃郊上玄以昭在宥聲從海流澤與霖究覆露入
於毫芒猶閨惲而敷茂慶霄揆而嘉穀穎顯蟹習之純
祐然猶噉其休烈慙謂小康斥去奇衰以謹怠荒邳大
隗而問道誦丹書而自彊攬日月以為明摘雲漢以辨
章前蜚廉以渙號後號屏使服箱靡握譽而為綢旒濛
瀼而慘昌光驅豐隆與列缺砰震曜乎鬼方永合德乎

泰清絃六合而為網
許曰灝灝與區昶曠
輝麗床神靈
兮睢睢盱盱泛泛溟溟
連廣廷兮戴盆掩袂
睇天障日
紛萬情兮維皇建極
維聖存誠
刪天經兮倬約
脂韋玄
溥棄隙洞蘊萌兮
沕滴曼羨錫屑
隤祉仡頌聲兮
時乘
六龍昭受休嘉
億斯齡兮

泰泉集卷一

欽定四庫全書

秦泉集卷二

明 黃佐 撰

四言古詩

登歌三首

油油翕雲維龍之朋君子來思球瑟和鳴和鳴鼓庸篴
帛既共式愉式誨君子攸躬 油油翕雲維龍之適君
子來思鼓瑟鳴球德輝孔周云胡魯不我留飲此芳醕
俾我昭受爾休 油油翕雲維龍之光君子來思球瑟

錚錚球瑟錚錚匪曰大康飲此芳醕以俾我尚于中行

翕雲三章章八句黃鐘清宮

俗呼正宮

驅馬滔滔遵彼林臯匪遊以遨將命靡竣我心忉忉

驅馬滔滔戒我徒旅匪遊以遨將命靡竣豈求寧宇

悠悠彼鱸

叶音

載浮載潛亦炤于潭將命靡竣父于何

瞻

離離彼翟

叶音

載鳴載飛亦集于萆將命靡竣母

于何依 駕彼乘牡夙夜孔皆匪遊以遨念我二人歌

以告懷

驅馬五章章五句黃鐘清宮

俗呼正宮

彼爾有棠敷賁于稷

音

煇煇輶車邁如弗克

我車徂

丘六轡既柔夙夜其勤爰諏于郊

我車徂岵六轡如

組夙夜其勤爰謀于野

我車徂薄六轡如濯夙夜其

勤爰度于國 我車徂宮六轡既雍夙夜其勤爰詢于

公

彼爾有棠五章章四句黃鐘清宮

俗呼正宮

孟冬親享禮成有述

天睠有明全付寰宇蒼精洞炁黃墟孔膺三極薦馨百
祇協矩列聖受之靈承于旅御歷執符率循倫序皇帝
獻聖克配舜禹河澄獻瑞虹流燭渚龍飛虎變奮跡南
楚躬發人文志蘊神武親以孝崇民以仁煦望日就雲
有睎匪賸紹我殷皇光于烈祖敷天之下歡謳忭舞慶
宵葱禧宸景晡旰更化圖新主敬作所休否成泰亨屯
幹蠱如彼巨室飭厥藻斧如彼天道以涼代暑皇帝篤
友翼室哀素遺大投艱創深痛鉅康陵告竣乃正當宁

乃於孟冬乃卜乃簿乃謀乃惟乃集有誓乃陳廣樂享
七廟主虞業崇牙乃縣乃樹箭筦琴瑟應田祝嘏欽欽
維庸逢逢維鼓作麟儀鳳吼鯨動虞鏜鏜鎗訇匪淫匪
怒佾舞洋洋拜伏昂俯既備既調既戛既拊大樂展奏
既協雅部皇帝乃駕齋宮往徯周廬星列閣道宵扃中
韶肅隊金吾設鹵千官景從接珪聯組龍旂雲麗鳳蓋
霞舉和鸞韻風旭旭許許亦既戒止殫我丹腑維精維
誠神若可覩赫赫彤蜚恍恍笑語左右贊相將事恭睹

揭虔妥靈孰敢有侮奉璋具鬯濯鼎及卣亦有藉茅大
羹元酒有梁有秬有稷有黍陳彼巨豆大房鴻俎腍脯
醢醢脾臠及鮪醢鹿維炙載有蠃羽皇帝乃奠盤辟拜
頤有祝伊升稽首覲護會精思誠灌我清醑神其來止
歆我簋簠陟降左右昭穆萃聚神其歸止祥飈靈雨雲
輿紆徐星驥容與光景繽紛絳霄翔翔皇帝孝謹拜受
神胙神錫皇帝千祥百嘏室家之壺眉壽黃耆執冒端
委作民父母於萬斯年永有中土神錫皇帝股肱心膂

翼以臯夔從以周呂納謀和衷同德夾輔於萬斯年匹
休扶珣神錫皇帝豐年亡竄懞懞瑞麥與與祥櫓陳紅
相因充滿倉庾於萬斯年下民奠處神錫皇帝聰明中
度天臨海鏡賢登佞去消彼獠獠鑿齒獬豸於萬斯年
無有噢咻神錫皇帝福女母拒於萬斯年永其福女皇
帝孝謹拜受神胙愴福載歸唐慈堂廡采薺奏節言旋
禁籞出御端門賜羣臣脯微儀熙穆從容燕譽如天之
澤如露之涓萬國同慶龍德斯普於萬斯年孝享受祜

於萬斯年埏埴順叙於萬斯年有明之緒微臣作詩用
繼商魯

短歌行送洪子玉方

秋露載晞朔雪云飛盡
簪詎幾駕言騑騑肅彼前旌奏
此和鈴風騄翼人遙如流星
今夕同堂明發異鄉何以
別子驪歌驚觴林疎壑清
山空鳥鳴風吹斷蓬與客徂
征子在燕洌洌寒泉撓不可濁
其流為川子在浙
寒泉洌洌思子如濯中心孔熱
石田碌碌逋稅斯督云

誰之故空其杼柚原則有杉隰則有藍糟糠粒褐饑寒
所甘

古樂府

鏡歌二十二首

正德十有五年秋宗室以寧叛殲于九江歸
于豫章就俘將告于甸人皇帝猶自將討之
以將軍泰為副游擊將軍彬閣人忠前驅所
至無不雷驚雲駭者七萃之士靡不懷歸臣

佐謹撰鏡歌冀有聞焉

朱鷺姚以般從以孔蓋車班班北至榆林南踰淮之水
駕之日千里鷺飛得飛止茹下游魚頰其尾皇帝飲酒
愜樂壽無極

朱鷺一章十一句

思悲翁梟子雄美人夢翁也從天以來下悲翁之來神
靈雨子朝以飛暮何於處猗嗟嗟松栢蕭蕭泰陵樹

思悲翁一章十句

艾如張羅卑以羅雀飛避旃將誰何雀以飛羅罹之鉦
鐺何以為嗟將問誰又何以為嗟此者誰卿道不鼓絕
聲白雲上天日月其明

艾如張一章十三句

上之回大驅馬汗霑野草百里赭行以北美人從不駕
舍行以南美人泣不旋駕左平虜右舄奕豫章率服威
武誰與敵

上之回一章十四句

擁離在朱巷珂馬避之誰者往前有宮殿跌蕩蕩箭火
飛從天門道傍謳者野遊盤萬年行樂誰不歡

擁離一章七句

戰城南分戰疆運握奇陳八方鎧甲紛負衷土黃龍江
之水洪湯湯馬得飲之人不敢嘗馘囚鄉晨解其縛犒
以錢刀暮用為樂願為忠臣死報國

戰城南一章十二句

巫山高高若何淮水遶之不可以過驕驄文馬錦障泥

我欲渡之徘徊而驕嘶陽臺有女居迷樓愛而不見煙
雲愁冑有蟣虱戶有蚍蜉嗟我行役今還歸

巫山高一章十三句

上陵以遊遨下津駐旌旄問君從何來來從朔方渡淮
濠輅獵為君車駕以赭白馬鼓聲琅琅漏初下手格飛
禽血四洒戶寐而訛絕行者宮監盱駭走且僵玉盤薦
食君莫嘗當天鳴鏑射兎獐須臾白日出東方

上陵一章十三句

將進酒君莫辭何以侑之虎揆思薦嘉穀陳雅詩群桀
既翦江無螭時邁其德隆天基

將進酒一章七句

君馬黃臣馬玄狹斜相逢不敢前黃馬馳逢馬逐後歎
沙前歎玉副以江許翼兩張翩翩倏如流電光周有穆
滿今聖皇君臣布德周萬方

君馬黃一章十一句

芳樹生蘭池華葉何芬敷鸞鳳去之栖者烏惜我西秦

氏家有蕩子焉為夫烏乳且哺生有雛嗟嗟塞爾胡乃
無帝何爾惜金僕姑

芳樹一章八句

有所思思我母慈身上錦襖襦母身清寧壽以眉日夜
要褻之於今化為緇嗟我乃多攜離水流東海歸何時
嗟我會面安可知晨雞鳴鳴不已東方明星光動地照
我馳驅走千里

有所思一章十三句

雉子班行可思雄求山梁雌從之羽短何由飛流宕原
澤中雉子雌以遨翁孺知之思羨其膏白龍化魚罹彼
豫且視子所止乃非丘隅謂之載之我有車雉子去我
將安所如

雉子班一章十五句

聖人出龍翩翩美人出以管絃千旌萬騎雄哉紛四家
從以部領軍舞劒浮白觴我鎮國陳秘戲樂復樂

聖人出一章十句

上邪下狹山童不可獵射龜向江江水竭願皇垂拱開
明堂鋪仁獲政和陰陽千秋萬歲長樂康

上邪一章六句

臨高臺望泗與淮言采其芑于水涯誰其殖之感我懷
奮戎東南逖以北無以逸欲臨萬國生民何依依我德
皇祖在天敬哉有赫

臨高臺一章九句

遠如期駕馬以出門咫尺步不可知林有虺水有蜮短狐

封狼肉人以為糜萬里吁可悲有杖之杜喬其枝皇人
壽穀今旋師

遠如期一章十句

石流江怒烏龍萬斛不可以渡江怒石流萬斛烏龍不
可以浮神怪隳突衛皇蹕皇潛以躍躍復出於萬斯年
保貞吉

石流一章九句

務成昭惟唐堯欽明秉德羣后朝建禮縵縵歌慶霄屈

軼在廷豐不彫茅茨土堦以逍遙望雲就日誰敢驕

唐堯一章七句

玄雲油油北風肅肅震電飛動拔大木雪電湏臾及牛
腹驅車隨鑿走折軸開弓射天中鴻鵠酌金叵羅奏蕃
曲

玄雲一章七句

伯益虞有虞智周百物禽用三驅無為而治永終譽皇
帝孔武徒手搏彫虎去其爪以蹲頻腓皇于後實率舞

猗皇之勇駭萬人山川寧鳥獸馴

伯益一章十句

釣竿何珊珊不如罟網賢
鰓鯉何筵筵不如鮪與鱣
網罟一舉獲者千彼鮪與鱣
潛深淵嗟鱣與鮪終棄捐
金瓢進御烹小鮮兜離歡呼
壽萬年

釣竿一章九句

樂府四首

少宰燕泉公奉使四圖曰職方使邊曰汴省

旬宣曰大僕考牧曰滇南巡撫詠者類多歎
豔愚獨以為正德時公賦半潤權屋輪蹄將
徧天下仕其時而莫省憂者非大臣也體公
志造茲四曲以備今樂府非故肆變以求異
云

關塞曲

關塞長關塞長引弓鳴鏑秋草黃臨交河望金微風吹
沙作浮雲飛詔期門馳羽書韋韞索辦辭穹廬惟職方

貫利同輜軒駸駸川原中撫長劒行路難有何者鳥菟
于弁搏雕虎接飛猱登頓濡跡安足勞徵九賦賚三軍
驍駘父馬徠如雲建華旄遏奔鯨奏鐃旋燭邦國寧

汴梁曲

伊洛亘衿衛沃野開豫疆分茅席英彥信多籌策良撫
翼希天池抗志詠甘棠控縹蘭臯側弭蓋椒丘陽夙夜
撫嫗嫗閭閻交相慶輸國有程度啓處安可遑露冕入
燕冀飛鷁浮河漳扶宮羅繡戶京室何煌煌引領三歎

息牽牛空服箱

燕山曲

彼崇崇者燕山北
頰碣石祁連胡
騎啾啾沸天摧
堅仗此佶閑
翩翩霞布星躔
冀產倣儻權奇
軍馱逸迅雄姿
忘釜引鏡黃驪
膺帝命主治之
濯龍歌萬福徠
東方之日照垌
服阜螭翥鴻驚
蹠足徒晞朔旌
西馳瑤水冥冥
寤標仰惟聖明

昆明曲

浩浩昆明池乃在點蒼山陽旁有羅施故邦螳附蟬聯

實焚蠻髮參錯其間一解宣父居九夷大道無不容白

日灼幽崖窮髮漸華風澆訛反天經由余諒非戎二解

髻鬋着衲襠礪刃馳且都投及拜中丞謳吟挾詩書嫉

巫信醫日和以愉三解兀兀彼薺麥薺我蘭畝培灌其

勤薺麥亡嗣有循聖賢長道屈此羣醜臣心不負陛下

聖上有倉浪之天下有孩提黃口四解

駘馬行贈別張侍御歸常州省母

駢馬驅河干飲餞相追攀駢馬驅河干飲餞相追攀朱

汗染月題玉珂鳴珊珊駕言將母千里當何難歌以言

之駢馬驅河干

一解

瞻彼瑤水旁芝草何翩翩瞻彼瑤

水旁芝草何翩翩采采盈懷袖盛以白玉杯奉母駐容

顏延壽千萬年歌以言之瞻彼瑤水旁

二解

象琯繞鳳

梁芳筵樂未央象琯繞鳳梁芳筵樂未央青女素娥迭

舞浩倡綵服延鮮風照耀日光歌以言之芳筵樂未

央

三解

騷辭

弔許大夫文

大夫諱遠汝寧人始令樂陵討劇盜大獲以
功晉僉山東臬事寧邱宸濠蓄異志久朝論
以大夫賢且才乃晉江西臬副俾制之至則
首治其黨蘖徐本之圖然勢且成矣既反即
執大夫問焉大夫曰予惟有赤心爾豈從若
反乎盍亟兵我又曰汝行當萬副遺臭萬世

也

閔大夫之偁辰兮扣斧鉞而商歌心惛結以涕洟兮何
倉浪之幽遐紛既遭回而樹伐兮身胡邈乎王家羗勁
杓乎妖藩兮卒離身而速化嗚呼恫哉兮大夫之純貞
世途氛霾兮翳雒棠以為明驅雞斯以守閭兮棄穉嫠
而駕衡紮長離而笄之兮鬼車戛戛而晝鳴謂鈎吻為
飴兮謂羶湮為馨犧尊棄于溷濶兮東龐涼以為榮長
門幽擯夫南威兮登確廉於魯城主伊臯以庖偏兮偕

來草而迅征于嗟夢夢兮惟荃之故鉤階苔繡兮泥歲
遵夫鸞輅幽痗諱其膏肓兮拒斥俞跗蹻蹻夾翼于皇
輿兮日懷寶而營富彼狡童亦何知兮乃窺覩而干天
步朋遊光以為侶兮魑魅集其如林嘑白徒使血人兮
鳴火狐而肆鴟音辟童觸廩而首灰兮顧宏肆其毒淫
萬艫銷于一炬兮程吳淠而卒禽桎拳崩厥角之紛如
兮飫珍穀夫何心維大夫之介特兮狡童齟以為仇進
櫂梳而杖之扶兮荃又昧夫好述碎寸鐵之弗持兮耿

忠略其誰謀表丹忱以就兵兮白日為之匿幽嗚呼兇
寧高張兮鳳摧其儀羽神龍失憑兮乃噉于鼠巷哭且
暝兮傷我士女綵霞蜚兮玉輶舉風蕭蕭兮神靈雨嗟
世之知大夫兮維守死而不移余惟追數夫荃兮登大
夫之匪宜朝有黜而淮南寢謀兮寔大夫之優為苟維
寄大夫以禦侮兮又何至勤外部而陳師既告旬以縣
磬兮聊以憫夫行路何大夫之同軌兮尚或䟽遯而齊
怒蹇大夫而慙遺兮固亦遵涂而窘步泊皇穹之純佑

兮何不改乎此度嗟佳冶之緯繡兮稽前修以皆然璠
璣有弃而抵鵲兮董寧有採而升筵董道構愍以不回
兮眎余袂之漣漣魂魄耿耿其在天兮亘宛虹之連蜺
點尚其有極兮永與泰素而周旋

琴操

琴操三首

有序

予尚友于鄉之古我者得師資焉於漢一人曰董正伯
和家于番禺通毛詩春秋明經為儒名士車遂自中厚

與居送遂喪還義動州閭黨錮禍萌徵不就公車清白
之操始終不渝為之賦元雲於唐一人曰張九齡子壽
產韶曲江喪親致孝感為文章拜翰林學士遂相明
皇知安祿山終必叛唐帝任李林甫日愾於色荒貶九
齡于荊卒可永傷為之賦荊山於宋一人曰崔與之正
子為增城人起家叅軍在在稱循登城諭叛卒宵懼而
奔官廣南安撫澤于鄉民史彌遠廢立辭俸不行理宗
命相疏十三陳秋菊寒泉娛老海濱為之賦菊泉夫貴

富亡常貧賤斯安苟利國家一身遑恤鄉人之古我者
如此於戲我猶未免為鄉人也其可不自救哉是用安
歌命弦竢審音者採焉

玄雲操

油油玄雲蔽日之光有昏者椽持天之綱禺原膺膺可
耕以粟駟馬高車無我囊三木若虞設羅色斯駮而被
巢于幕于嗟殆而

荆山操

我徂荆山歷彼林與丘大道坦坦我行夷猶丘則有貉
林則有麻我採我獵供我后裳與裘匪裘裳也則無寒
暑詒我憂嗟我后聖矣國誰與預謀猗

菊泉操

菊之株挺挺兮匪則有柯兮泉之源龐龐兮匪則有沱
兮柯維其那沱維其波我嘯以歌兮雖有截肉予以餐
我菊兮雖有甘醴予以酌我泉水兮匪菊之馨匪泉之
清我憂如醒兮

琴操一首贈別徐可大

岳峰子有古道者也陳我臬事且歸矣子做
古聲以贈俾弦而歌之

岳峰高兮石離之高賢藏兮民知之中有田兮側有茨
褐之父兮耕治之烝而雲兮倏而雨雨滂滂兮峰之下
田晦晦兮以禾黍雲兮歸兮吾待汝

樂章

孝烈祠樂章二首

濮人宋顯章廬父墓備極哀惻寇起所過殘
滅至其墓相顧曰孝子也遂去之雖松柏無
翦者嘗為郡庠生試弗偶以卒卒之日妻辛
氏慟哭以死自誓數日不進一溢米竟雉經
焉知州李緝上其事於朝且立祠歲時祀之
州人倪御史宗嶽俾予為作迎送神樂章

鼉逢逢兮考鯨湛椒漿兮列蘭蒸五音飾兮散繡張瑱
瑤席兮玉英簪蕭炳兮拜以頤琴瑟奏兮雲門舞南垓

閔兮栢舟靈不徠兮夷猶驂泰鴻兮燭龍轡慶陰陰兮
靈其有喜儵蕙帶兮荷裳又金支兮翠旗駕鳶鵝兮靈
之徠靈徠不徠兮我心悲

濮山隈崔兮濮水滲汙高賢愉愉兮繫孝而烈穆並騁
兮槃桓擘桑梓兮涕潺湲象輿輶兮憺容與靈臨饗兮
福我士女矯揚光兮宴娛永山側兮雲施般姚姚兮裔
裔靈何為兮淫然逝褰霧縠兮宵冥冥山水夕兮含清
春有蘭兮秋有菊結無極兮芳馨

泰泉集卷二

欽定四庫全書

泰泉集卷三

明 黃佐 撰

五言古詩

情詩二首

玄雲亘北陸朔風銷繁林荏苒歲律殫廣庭多沍陰仰
惜流景迅俯歎無完衾所思眇天末欲往冰雪深寒鵲
求其曹當欄遺我音翩翩倏相逐望望獨傷心傷心不
可極付此焦桐琴

旭光射凝雪起望前楹東魯雲忽蔽虧感嘯延緒風緒
風無迴輪魯雲自冥濛佳人悵何許天阻安可通暉目
亦知晏蟄蟲亦知冬營魂抱區區佇立思音容歎息詠
其雨勞心夜冲冲

學古一首為人代贈

信誓願偕老綺筵當夕張蕙心美無度蘭釐明洞房柔
情方日洽健翮俄風翔金門邈霄漢玉音限河梁憂來
拊齊瑟偏側中自傷人生有離合世事安可常妍華化

枯槁會見熙春陽

歲暮言志一首

華年日婉晚
隱几意不愜
晞古思振纓
撫時淚承睫
遙聞達術中
車馬競馳蹀
金張富熏天
漢貂垂七葉
紛紛夸毗羣
蹇諤叵容接
守樸道所敦
彌文世方業
遺經如不售
已矣事畋獵

憂旱詞四首次周天保韻

火昊何肆兀
頽霞條舒歛
陽崖卉漸腓
陰畛穗猶悞
凌

晨秉良耜屆午已重趼豐殷雖有願薦蓂竟難展龜拆
徧沮洳象耕失巖嶽赤子本誰責黃塵昧子眼下泉良
可悟膏雨亦云遠桔槔正紆急襁褓俄揭淺颺嘯起長
歎司命孰回轉

端居揆天道回轉藉人理歌雩泊周典犧禱懷殷祀靈
鑒未云集甘澍難久竢鴈鴈咸池升浩浩元雲起光景
方蔽虧怛靡終已重陰悶閭闔阡術多荆杞幸此彌
天澤貺我崇朝喜魚龍恣澆潏卉木紛旖旎驟焉不終

惠昭假竟誰恃

昭假嗟無端汗下如流永長颺旦夕起萬里火雲動仰
晞灌木陰俯美滌泉涌箕畢澹不芒蔚薈齊以聳積陽
忽退舍有淦弗旋踵滲漉洽壠壩慈菴被疇壑數極見
仁憫望愜免疑恐亮非牲玉感尚覺蘊隆重誰能揮龍
淵為我刑蟬疎

蟬疎不可指矧可刑使雨氛侵未詎銷霖澤自為阻爕
調付茂宰陶鈞自明主天居崇萬里齊州隔九土薦馨

維齊明厚生在農扈
嗔雷怒未平
場苗青幾許
龜腸營
一食鶉衣成
百縷
頗聞禁苑涼
鳳吹導鸞輅
憂來奏虞
弦操縵且調柱

贈黃子令浙水

沐浴際嘉運
王路方清夷
九重軫民瘼
推擇為吏師
夫子受靈眷
宰邑撫嫠嫠
露冕浙水春
銀章有光輝
種花當使滋
澤民當使肥
中心發陽和
涸野成良畦
灼灼崇桃枝
徙翮聊假栖
一朝風雲合
當為鴻鵠飛

送邱子令餘姚

車蓋集宛洛愛子能久要覽此光熙運奮翮揚英翹綬
綬宰花縣飛鳥凌雲霄別子問何時朔風驅玄濤落葉
歸本莖茂松見後彫君子秉真性豈為寒暑搖援琴奏
清商悵望心煩勞孤鴻遵脩渚別鶴唳遠臯慙慙仗尊
簋於焉永今朝

送盱令秦凱北上

弱植抱匡濟宰邑光有孚妖藩構天禍奮身被縲胡談

笑翦鯨鯢志與白日孤長颺激西江斟彼烏林謨奏凱
赴皇闕裨海皆歌呼鼓角聲遏雲組甲光載塗行當荷
寵靈千載昭令圖

送劉子養和督學山西

金風鳴素節嚴霜肅中垆新豐木葉脫灞澹寒波生送
君郭門道銜命戒晨征飛憶指蒲坂落霞隨旆旌陳臬
在風教晞古當振纓堯宮土華碧舜山烟草平相期闢
皇路為君謦德聲

湛子宅夜讌和呂子仲木邊爐詩

圍爐坐寒夜嘉賓懽以盱朱火光吐日陽蘇滿前除衆
肴歸一器變化斐然殊食美且需熟充實諒由虛妙悟
得同志攬環誓相於

雲州隱居

結廬天水交菰蒲斷人境水氣蒸為雲搖光混波影清
飈驅雲去淨綠澄萬頃心隨游鮒適目送狎鷗迴卷舒
悟世理流動入神領舉觥揮碧寥浩笑策飛景與君論

大年龜鶴未為永

遊李將軍梅園呈同遊張廖童三子

招尋出秋郭蕭晨恣游冶涼飈連天末紫翠滿平野駕
言稅梅園水竹自幽雅方舟散鷺鷥通川入桐櫓興乘
虛籟發目送驚湍瀉雲飛答流諷川泳避揮葦盤紆極
展眺塵棕條瀟洒微茫高嶼外隱映暮霞赭營懼恨晷
速顧景不能舍今日迺何日勝引得陶寫達士謝溟滓
浮榮譬風地文案苦纏糾况復役車馬緬懷區中人亮

志良已寡

伏讀今上即位詔有述

皇穹新泰運帝蹟發郢甸謳歌仰元德恭默受靈眷甘
澍從寶輿瑞日麗瑤殿宸景既昭矚慶宵亦葱蒨得一
天下理吹萬群情抃渥恩流宇宙絲綸迅風電扶聽走
哀白喜極淚成霰毅皇昔開邊寓內輪蹄徧大阿忽所
持群妖競方煽虐焰然不息豐鎬失詒燕悔從黃竹萌
痛自烏弓戀亨屯出雄斷休否席耆彥布護神武震灝

聖人文絢奸如轉石去賢用拔茅薦外圉事橐駝內帑
發餘美鴻猷悉以舉丕構從此奠非心在黃屋恫瘝惟
赤縣煌煌嘉靖治不厪鬼方戰崇極得辭圯宜民見通
變稽首誦堯言萬代永如見

掄材赴公讌作

掄材受明詔躡步金馬門清塵接台衮影節追華軒高
讌春官署序爵列長筵散秩一何綺桂精映蘭鐔方懷
失士懼敢營酬酢歡金玉贊王度化成肇人文引領睇

皇居紫氣騰元間
聯翩謝慈惠稽首復何言

春院試士二首

春院寂以迥
魚鑰何重重
哲匠責嘉運
海鏡開昭融
華鐙照藻服
虛堂流夜虹
豐膳侑清觴
有集惟俊雄
入帷見素月
鳴枝懷緒風
天心同靜密
坐待虬漏終
蹇衣拂
輦礪矯望
明河空協極
待群彥道合
時乃雍安得
翺翺羽接翼
鳴高桐

冀產多龍驥
荆山饒奇璞
永懷蘇氏愆
願騁孫陽目
擁

衾盤礫羸秉心向明燭朝餐青玉案暮御流黃幄衣緼
甘食并於焉愧珍穀誰令鈎棘習回瀉見熙穆偉矣歐
陽子千載仰喬嶽

出京別親友三首

潔身遊魏闕周旋未言殫天衢何崇崇短翮思飛翻賴
我金蘭友婉孌同所歡銜恩負羈縻遙役指岷嶓威蕤
集端委璀璨紛盤飧朝車發朔塗莫舟泊河干蹇袵自
茲去佇立懷辛酸矯矯飛鸞鳥奕奕彤雲端會長不自

慶別促空成歎

杪秋天地肅元林嚴風發嗷嗷宿雁起萬里黃雲沒行
子懷越都胡馬嘶燕月佇立睇川原川原莽空闊樹萱
亮有懷食芹曠未達况茲別親賓何由慰飢渴昔為驂
與靳今為弦與箏

駢服本同駕葛藟亦相因辭家忽五載良朋成密親貞
心秉金石綺言麗蒼旻終始誓不渝輝光期日新歲月
不我留鵲鳩鳴蕭晨驟駒方載路萬里違音塵志氣恒

相孚異縣猶同人行矣各自勵修名良足珍

登衡岳值風霧至絕頂忽霽感靈貺賦二十韻
炎德殿南戒元功協北祇大哉祝融祀邈矣陶唐時錫
民溥鴻澤翊國隆駿基明明翼軫列滔滔江漢馳屹柱
立乾棟連絡亘地維衣帶縈三湘嬰孺撫九疑攢峰鎖
蒼霧標嵐橫綵霓青玉固葱蒨朱陵亦崑崙茲山擅雄
峻伊予嗜靈竒停驢諧夙願影節隨所之仰探丹鳳穴
俯見元豹岵冥濛苦氛縵窈窕多路岐皎鏡雪方積虛

壑風何悲豈知凌絕巘及此娛晴曦歛吸竭靈景混茫
開太儀烟靄散林薄雲光溢川坻平厓少延佇窮髮皆
可窺振衣望郢甸披雲辨京圻如彼朝陽鳥跂爾梧樹
枝整翮自茲去翱翔本無期

瀟溪

真儒去代久一畝存遺宮瀟泉冽不食旦夕寒淥淥芙
蕖謝光彩卉棘紛蒙龍烏鳥聚喬木噉噉鳴積陰依岩
見樵爨駐轍聞村舂日晏牛羊下秋高禾黍豐遡源曠

無人沿洄焉所終蹇予勇言邁杖策安能從精靈諒斯
在沕穆相為通繫昔宋中季皇流疊褒崇披雲起結構
洒翰盤蛟龍霽月輝朱綴光風搖瑣窻誰令坐消歇吾
道曾何窮

月岩

驅車冒靈雨月岩訪幽竒引領穹壤間見此兩鬱儀蟾
兔耀白日神工開翠崖金波互盈朏玉輪中渺瀰消長
瞻世變弦望通天時廣筵得明牧脫幅忘塵羈葭鳴虛

籟起杯深靈景移因之發長嘯風生叢桂枝

送秦刑曹之留都

瞻彼長淮水上有孤鳳臺驅車發朱夏歧路何恆台淑
問睇臯陶振纓感我懷我懷草昧初經綸協雲雷晉接
有遺構豐芑多良材粲粲琅玕花亭亭倚風開昊穹正
元邈孤鳳何時來

蓮亭奉南渭王宴中

菟圓啟瑤構靈沼競芳鮮蓮花何曄曄蓮葉何田田耀

魄汎空波神飈起中天馨香入襟袖把酒心茫然懿此
出深澤素質虛以圓本無枝與蔓何懼外物牽緬懷君
子德冥心入冲玄嘉賓從南來浩倡協虞弦閭閻一以
阜民愠從茲捐徽音徹穹屋清歡眇雲烟思為雙飛鶴
接翅浮漪漣

大興隆寺小集贈別盧侍御堯文分韻得冕字
孤飛思比翼獨行願同輦自我違良友契闊情不淺京
洛期合并江淮悵悠緬今夕乃何夕及此會軒冕寶瑟

延素月金壘耀芳宴問子何所為令猷日光闌乘驄訓
青衿雕龍理黃卷譬彼荆山璞追琢盡成琬采蕭固三
秋藝蘭亦九畹洋洋清商闕宛宛車輪轉脉脉銜離憂
惻惻增婉孌潞渚肅清漲秣陵望丹巘自非南流景何
繇知近遠瑶華遲爾音瓊樹跂余蹇千里通精誠願言
各敦勉

秋日登萬歲山不果至瓊華島遼后妝樓而返
與張廖二子同賦分韻得登萬二字

元天臨析木白雲出丘陵皇居阻通軌神池閔清激翠
峒紆歷覽瓊樓恣攀登陽陸日月迫陰厓雷雨憑凋闌
綴碧蘚藻井巢蒼鷹炯戒鑒夷夏端居思廢興飛狐已
迢遞疏龍向軒騰宇宙席休運人神歸聖能同遊集軒
冕縟儀崇股肱虹橋架鰲炬星旗翼鸞乘靈踪固葱蒨
秋霜正嚴凝撫化惜遐旻覩物懷堅氷長嘯倚林藪浩
歌望觚稜虛籟殷珠樹涼飈搖玉繩茲遊信有適誰言

殊鷁鵬

青梧飄素秋烟靄變昏旦所忻天地肅適意山水翫眇
默循玉闕威遲度金澗長虹浮大川積翠亘天半瑤甍
拂台斗綺窻瞰雲漢丹梯指遐坂黃圖入英眄鳳京環
百二鵬霄翻九萬風起雲嵯峨日耀樹凌亂昔聞青娥
妝今日碧草蔓採蓮無緩歌握蘭有遺歎淋池翔玉鳧
芳洲宿朱鴈蹇予及朋好羨爾遊波瀾謔浪金門隱淒
其廣陵散扣闥詎有遇褰裳庶無悶緬懷岩桂叢徘徊
歲將晏

聞汪侍讀奉命校書建陽詩以奉詒

矯矯鸞鳳姿翩翩出蓬海吐卷嗟已塵銜甲今安在姬
壇久零落孔室沉光彩振翮時一鳴人文朗千載緬邈
閩嶠東瀟灑辭駕鴻而我詠芭相騁望愁烟空蕪葭下
玉露橘柚搖金風因之感搖落征心夜冲冲

十六夜補之席上賞月分韻得水字

長風吹燕樹月色浩如水華堂撤明燭飛軒集同軌金
波散牕戶瓊筵一何綺興隨虛籟發歌逐流雲起清輝

雖可悅虧盈自茲始人事有代謝況乃幽元理惟恐秋
已深嚴霜被蘭芷默坐聞疎砧孤懷渺千里

學古三首贈胡承之歸關中

翩翩雙鳴雁噉噉雲中飛娟娟蛾眉女札札流黃機棄
置不成匹嘆息減容輝問女何所嘆良人悵有違萬里
遙相望何由接音徽蕙樓鑒素月蘭鐙暖虛幃身非驂
與服安得同車歸河清尚可俟會合何可希臨歧奏此
曲淚下誰能揮

巾車返初服凌晨發京洛引顧咸陽道雲山互參錯威
夷眄三塗嶽岑辨二岳草樹鬱仟仟溝塍紛漠漠霞日
映宮雉明滅見城郭行子歸舊疆園田懼蕪落莊生傲
柴柵臺公願藜藿已蠲原憲耻無論啟期樂道因儻來
悟心泯然疑作達士有違矩卷舒在龍蠖

元冬服纖纊不若貂襜褕新知雖云樂不若故人殊華
軒豈不美休休惟故居故居乃何所乃在秦城隅山泉
環戶牖樹木何舒舒開簾見栖鳥臨淵羨潛魚孤菊揚

其英芳草不復除適意向井臼陶情在琴書此生諒已
得不樂將焉如

八美詩八章章八句美同館八君子也分攜眷
戀聊宣別情云爾

張侍御

補之

水南鸞鳳姿栖心向丹霄蘭臺聊大隱塵埃視金綢詔
我一東詩粲粲英瓊瑶容輝在寤寐鄙恠猶自銷

張太史

文邦

龍湖蘊神奇豪爽絕今古性不纓垢氛嘯傲對珪組存
身貴深蟄偕時乃施普炳炳金叢言銘之在衷腑

葛黃門

子中

魁山異方傑博雅能沉幾振纓願匡濟握鏡通元微中
章吐芳訊煥爛雲霞飛行矣掩瑤瑟知音良已希

趙黃門

信臣

洪洋秉清真胸次無塵滓高卧煙山春條為蒼生起裁
詩最清絕秋月照寒水臨岐懷好音軫念林居子

楊中允

達甫

方城甲天下靈氣鍾神州
蹇諤斥奸佞譙光遇王侯
青冥翔健翮白日縣方猷
喟焉傷別促采蕭詠三秋

廖太史

鳴吾

廖子謝白鹿英聲振金馬
揆天摛雄詞星辰絃九野
鳬藻競馳目驪珠遂盈把
嗟予蹇且拙末由追大雅

鄭黃門

九萬

鄭公不勝衣見義奮直前
日月勤獻納忠憤思回天
芸

閣昔講肄器重余獨先誦抑師衛武終身知寡愆

王太史
允興

蘭陂何溫溫璠璣美無度遇事類遲鈍潛心絕馳騫六
籍究萬微績學日宏富燕郊獨送遠離情滿毫素

遊通天岩同林二山憲副作

石林展奇眺飛幟遵崇阿翠壁中洞開雲日相盪摩桂
戶頻瓊闕花宮敞銀河四顧絕埃壘顥氣流靈龢披襟
倏蕭散盤礴興嘯歌陶陶隨所適野酌依烟蘿皓月照

堤柳微風揚澤荷塞帷自茲去真賞豈在多

白沙新祠二首

尼山日雲霧嘆息彌軫情萬有何芸芸虛完本中局好
古遺真筌乃為耳目營所以林居子持此常惺惺嗟彼
芷與離不同春草榮元穹正搖落辛勤薦芳馨

崇祠倚雲漢影纓陟遐坂蕭蕭木葉下冉冉歲月晚貞
元無停轂端坐知易簡環顧望九州天遠一何坦黃鶴
去不息白雲何時返

同年會以新秋同年雅集為韻六首在會者顧
僉憲溱劉僉憲喬余給諫經梁侍御世驃倫侍
御以諒及予也

南紀肇秋序金飈動高旻今夕乃何夕讌笑成陽春顧
劉憲度肅余梁鳧藻新倫子材卓犖俱稱華國珍媿予
澹蕩姿海鷗竟難馴

明月滿庭幽照我紫綺裘攜手步明月舉白交相浮歌
聲浩無倪颯颯松桂秋情隨玉山倒興逐銀河流五君

顧我笑真成鵬鷃遊

粵客鳴絲桐商聲出瑤空始奏天地肅再奏煙霜濃萬
里久為別一尊今始同願排十二翮乘雲扈飛龍三星
在丹牖可以明深衷

落落荆山璆輝光燭中天舉舉同聲友五彩蔚相宣舒
嘯擬鸞鳳搖筆生雲烟玉壺酒易滿金樞月難圓對景
不盡意應嗟離別年

海濱集群彥蜚英振風雅對月成七人可以當作者顧

予忝嘉招瓦缶混瓊瑋天長去鴈迥霜急飛梧下因之
感搖落忘情共陶寫

碧山金琅玕綵鳳日翔集氣誼有不同只尺寧相及主
歌白駒勸賓賦長鯨吸醉來願天遊海月期俯拾蹇衣
渺然去玉露沾塗濕

避暑矩洲書院與歐陽憲副汪少叅黎倫二道
長王主政同賦得矩字

招搖出西郭宛轡臨芳渚浮陽耀原隰凱風動禾黍伊

人不可見中坻敞衡宇開軒游鮒適卷幔賓鴻舉顧我
平生友茲焉澹容與肅肅嘉樹陰行歌謝徒旅晞髮散
煩煥蜚觴對靈雨好樂無太康先民有遺矩襜帷難久
淹虹橋屢延竚嗟彼鳬與鴈安知慕儔侶

秋日登鎮海樓有作呈同遊東庵徐憲副顧小
涇劉魚洲二僉憲

飛樓鎮重溟鑿翠倚太清翩然彩雲上玉京連五城綺
戶環日月丹梯殷雷霆秋風左右至松檜皆金聲留連

紫霞賞慷慨滄洲盟俯視几席下茫茫盡塵纓
鰲極莽安在鯨波浩難平

遊粵臺與方棠陵倫右溪王象川倫彥蕃同賦

得覽字

精廬展良晤勝地紆元覽舍興躡鳳磴聯袂度雲掩
粵臺一以陟遠翠紛可擘瀟瀟雨初霽冉冉日欲曛
川光溢寥廓野色開黦慘長謠出金石英論照肝膽
於焉謝羈束何必理鉛槧沉冥聖所珍傲晚吾豈敢
憑林悟榮

悴步壑玩流坎霸圖有遺跡因之動遐感

泰泉山中二首

清曉遲來客采芳從岵間
織鳥忽飛動蒼松澹然閒
回顧丘中雲為我封柴關
風吹唐棣花灼灼翩哉翻
愁馬抱饑渴默坐愁烟山

流水出深澗秋風送啼鳥
邂逅問樵客薇蕨今多少
行歌去不顧倏在煙蘿表
鸚鵡各有適耳目暫無擾
緬懷區中人營營自昏曉

贈吳白樓學士展墓歸蘓州

雲海縱飛鱗風林戢歸翼委質贊王猷胡迺懷家食端
居揆物理去住各有適而我違松楸感歎靡朝夕肅穆
戒徂兩天惠流丹極揚旌潞河外稅駕崑山側緹光發
芳甸積雪成春澤應時須哲匠因之感行色蒿宮承日
耀扈閣凌天闕戾矣母優游皇情軫明德

六月于役西江感群公餞送有作

西江肅王命衝炎柅蘭舟陳臬有程期將母不敢留軒

車遠相送悵別情綢繆朝發沉珠浦夕宿拾翠洲靈風
吹柘旗海天浩悠悠顧見肅肅羽與波競沉浮奇雲混
高山豐草翳層邱自古負羈縲我何懷殷憂

桂山

桂山何高高高可肩岱宗秀色灑百粵元匠開萬峰恍
如躡孤鳳驚鳥翩然從又如乘雲槎星潢浩溶溶風迴
玉琮琤日射金玲瓏珠樹徧岩穴仙聖留靈踪我欲轡
羲和珮結蒼精龍峩冠朝太清獻此青芙蓉天長綵霞

遠歲晚蒼烟濃長嘯倚盤石笙竽滿杉松

蔣少傅約遊湘山阻雨不果招陳宗卿同讌湘

臯書屋

湘山韞奇秀浩然歌遠遊晞髮思春陽衆芳愛曾邱星
車夙言駕六轡一何柔密雲翳扶木蜚雨洒道周亮無
精誠格皇穹浩浩悠悠弭節升公堂綺筵羅玉羞晤言獲
飽德良友副所求彈冠謝薦達緩帶成淹留黃鵠拚拚
飛所覽在九州而我方永懷山川空阻修自非采蘭杜

何由結綢繆願迴燭龍照庶以寫我憂

道州何司空席上作

司空脩禹績聲華藹孤騫
臨荆山玉虹光燭中天
春陵雨新霽延我於邱樊
卜築在蒼翠架構依巔岼
琴書一蕭散遲日滿前軒
和風泛煙際有鳥鳴樹間
但覺清尊滿不知斟酌繁
閒堦玩水踈籬見遠山
遲迴步苔徑盡我平生言

三至軒為陳高吾中丞

提提高飛鳥羽儀耀臺端顯顯高吾公德威為世觀章
江三弭節不辭道路艱旄倪見公至煦嫗成歡顏章江
東流去城郭何鬱盤臺中啟華構桂戶揀以蘭祥鸛仰
迢遞賀燕來翩翩豈為麗丹雘芳馨良獨難端居揆時
運晤言及湖山邂逅適我願悵別起長歎

浣俗軒為孫德謙

冥鴻避矰繳威鳳栖琅玕呼洵埃壒中誰能迴羽翰浮
榮逐不舍乃見掇危患嗟古賢智人天遊恒閉右閉

關求我志出即事廊廟文案雖糾纏音徽自高妙元珠
翳紺淵晶瑩有餘耀朝市藏大隱振纓可同調右同調
子鳴鶴異臭誰斷金皎皎嘉石陽肅肅棘樹陰循除聽
流水鈎簾見鳴禽嘯傲層軒內聊用洗我心右洗心寔
稽古攬名非埃命利本競錐刀色能讓千乘義欲在丹
書聖狂有明鏡懿維皜不滓芙蕖秉貞性右貞性本自
敦迺為薄俗移驅車出門去擾擾多塵縉濯足蓬瀛流
晞髮扶木枝俗累自茲浣天衢以為期

洮水

驅車至洮陽山川互盤紆淮南征戰後衣冠滿郊墟好
鳥鳴青林交交如自娛問女遊何所戢翼方踟躕湘沅
自南北人生無定居桑土陰以雨何由能拮据隨陽媿
鴻鴈逐美憐駟驢託身苟得所不樂將焉如

衢村書屋三首為范憲副題

天衢何坦坦乃在東甌陽和風蕩原隰戴勝鳴高桑課
耕有餘閒擊缶歌慨慷世途方好徑而我循其常車馬


帶傾覆貧賤起膏粱不見陵陂麥千載同感傷

天衢何坦坦乃在東甌側中田敞衡宇流水亘長陌逝
者每如斯守真在冲默好盈非所知適意即安宅草木
感懷新吾亦欣有得何必凌青冥羨彼雙飛翼

天衢何坦坦乃在東甌隅主人薄言歸豸服紆金朱杖
策玩魚鳥下帷理琴書舉俗愛芬華誰能有此廬退耕
混沮溺出即衛皇與白雲蔚高山浩然懷卷舒

嚴州孟太守去思亭

魚龍召風雨仁義徠蒸民有感豈不孚所貴惟道真顯
允孟夫子為邦善經綸陽飭一以播弦歌日莘莘至今
興人誦惻惻懷二親稅履表遺愛危亭瞰通津巖山石
齒齒嚴水波鱗鱗水石會銷歇景耀垂千春



泰泉集卷三

欽定四庫全書

集部

泰泉集卷五

詳校官給事中臣王鍾健

中書臣劉源溥覆勘

覆校官中書臣宋 鎔

校對官學正臣湯 垣

謄錄監生臣王寶唐

欽定四庫全書

秦泉集卷四

明 黃佐 撰

五言古詩

詠志二十首

栖遲衡門下向夕絕來鞅輕風蕩微月元景振清響遊
心觀物化閒庭恣偃仰蒼蠅以翼鳴營營在蛛網鴻鴈
隨陽飛一覽八紘廣

朱火照元夜耿耿懷平生雲漢經中天為章竟何成瀟

滿風雨歇引領晨雞鳴
褰帷納素月悠然鍾我情

永夜聞商歌迅響何裊裊
淒徹天地游儻出深沼
豈無雅與南所嗟知者少
美人悵何許遺世隔雲表
容輝耀日月芬芳徧幽眇
緘書道情慤願寄西飛鳥

太儀運天地日月相沉浮
瀛海揚其波巨鰲奠神州
真宰每如茲逝者何時休
姬公避管蔡仲尼涕裊周
從事不及時毫末成山邱
雞鳴盥漱初營營何所求

端居發深省怵悵莫予語
松喬鍊金質永為萬象主
褰

裳從之遊凌霞頰寰宇熒熒桃李花
翳翳蟬蛸羽胡然耀人目所得能幾許

登樓望高山密雲結重霄農祥阻靈雨
四澤居然焦遙遙慰我心青青見陵苔
常恐鷦鷯至衆芳從此凋

今茲復來茲願言美禾麥飽食輕寸陰
何由崇明德日月馳光輝中自為蟲賊
天下歸其仁顏生惟自克芟除若不早
斤斧何嗟及今我長兢兢雷聲在淵默

城隅有奇樹昔為霜所枯東風旦夕至
枝條競芬敷達

官駕高馬萬夫行避途威光奪霆電意氣傾皇都逢時
恣噓喻政道猶蒲盧何哉仲尼志浮海思乘桴

大道久已隱中情末由寫所欣青陽動庭槐綠盈把仲
尼亦何歎匪虎率曠野出門望長川誰為問津者

上山采芙蓉日莫傾筐歸騶軻陳王道脂車向梁齊龍
戰方擇肉志願空令乖理人爲之牧嗟哉名實違布穀
春無畚促織秋無衣悠悠感物變惻惻懷烝黎

昔余客幽燕步上黃金臺駿骨日以輕昭王安在哉樂

生功未奏荆卿為禍媒風吹易水波蕭蕭有餘哀誰知
百代後東閣凌天開豈令寒謬士零落同蒿萊

崦嵫廻羲輪丹淵出明月天地為壚鍬膏火相煎滅賢
聖皆糟粕蘭玉豈芳潔咏彼蘓門歌撫運慙薄劣

熒熒陌上花懔懔邱中麻纍纍王侯冢望望令人嗟六
龍運元化千古成塵沙吾聞浮邱公駕鴻凌紫霞呼吸
日月景永用思無邪貴富豈必終不見青陵瓜

凜凜風霜厲喬松有貞性物情無定端巧言動人聽掇

蜂傷吉甫拾煤眩孔聖隔垣聞闐聲曲直誰能竟

輕車駕羸馬悠悠遵遠路東指泰山岑蒼然翳雲霧媿
無魯陽力何由照誠素徘徊彭城下聞有桓魋墓朽骨
灰已久石槨安能固但見榛莽間縱橫走狐兔

巍巍祝融峰南臨沅湘水弭節登其顛天下猶敝屣仙
者三五人相招飲瓊醴羽駕倏不見丹書誰為啟北歸
邯鄲道浮榮何足睨

猗蘭生深谷脉脉含芳馨焉知塗上士木槿同朝榮達

人貴淵潛豈能夸譽名中山有奇鳥啾然鳳皇鳴商風
一夕至毛羽空洞零

陰陽迭升降宇宙安所終誰從廣成子超然入無窮南
山倚招搖於馮息微躬白荅釋我勞巾谷挹條風南禺
有鷄雛願言種梧桐豈知八桂樹乃在番禺東

予嗟稷下士馳聲仁義場危冠切浮雲寬博為衣裳進
退協矩度調顏逾珪璋冲澹焉足保利達乃其常豈若
事畋獵鳴鏑馳高岡割鮮醉言歸百里無豺狼

荒哉陽臺夢無情成匹仇苟非精神合溜湏為斷流漢
廷富群策一言相千秋金石勒盟誓倏忽嬰罪尤河清
尚可俟漢廣不可求言樹諼草花庶用忘我憂

陵祀紀行與姚維東殿撰

銜命承明廬明發戒徒御逝將謁陵寢川原莽馳驚浮
陽映邊堠豐草被廣路英寮諧所懽聯鑣叙情素輕雷
喧薄陰燕山靄然莫前驅抗雙旌泮水凜吾步息駕謝
人役撫勝得天遇商雲吐金波圓景在高樹陰晴無定

端聚合良可悟與子永今夕願言麗金籟

送大理卿鄭公訊獄如陝西

長焱徹炎暑蕭然燕冀秋天高萬物肅曠士懷國憂棘
寺祇王命嚴程戒華輶自聞帳下變涇渭顏不流騁望
五陵外莽莽胡雲愁原獸惡罔羅時澤亮不周平反資
淑問及遠遵壯猷君看鷹隼擊詎同鵬鷃游河梁阻西
笑悵別徒悠悠

讀伯夷傳有感

求仁本無怨感義聞盍歸清風滿孤竹首陽何巍巍拜
誦孔孟言永矣旭日輝何哉馬遷傳夏與周紀違左右
兵義士采彼西山薇克蚓亦土毛否臧非德威武成二
三策撫卷悲疇依

卧暄二首

魯麟獲已久禮樂日以新大化隨浪遷鬢變不待人負
暄東榮下泯默安形神弱子左右戲歌我頭上巾倦且
效龍卧寤言為鳥伸陶情舉塵爵覺有羲皇春

廼者龐德公耦耕栖鹿門荆棘視城府軼駕誰能軒
吾廬在通達車馬時往還抱獨以混世曲肱道終存采芳
息塵務觀書忘市喧委和在我躬悠然感乾坤

調鹿出郊謝徐方伯惠酒

調鹿適林野就萍荒水濱水流日東逝春序猶依辰傾
耳無市聲在目多亂雲寒岩寂如冬古木相與親有酒
來南州連觴飲其醇班荆亦縣榻素心良已勤醉來陟
高岡萬化皆呈新陶然牽鹿歸放浪存吾真

春日草堂雅集分得橋字

浪迹栖烟山采芳
混漁樵東風隨我行
不遣瑤草凋招
携二三子鸞歌躡虹橋
絃琴坐白石萬壑生神飈
真樂
豈在酒所貴能久要
長松閱千霜飛蘿拂丹霄
好鳥枝間鳴飛去枝
搖搖後夜弄雲月
相期揮碧寥

南園三忠祠分韻得院字

鷓鴣鳴素商寒威起
松院疾風被野草日覺群芳變驅
車遊南園雲構蔚霞絢
桓桓三君子萬代諒如見
嗚呼

炎宋阬中華駮龍戰金陵生厲階雨雪集維霰誰令王
多士藹藹甘為媛黃河歸紫塞久矣忘燕汴艮岳成紇
干湖山尚芳宴荆淮日以蹇幹難燭方煽辟彼強弩末
魯縞何由穿音胡塵暗三極朔氣瀰九縣力斷匈奴臂
虛發天山箭長纓竟莫繫大義赫霆電鯨濤浩淒惻中
有慈元殿樓船載國沉輝光與天炫群龍翼日飛隕首
猶懷戀哀哉田橫島不見華元面燕市望蒼梧哀歌淚
如綫吾聞賁隅都卉服禹所甸通非羸政始跡是虞皇

踐厓門對韶石高岡兩葱蒨危亡人所憐明良吾所美
緬懷南薰弦宏達四門薦言開城且閉國步何由奠有
道四夷守無為萬情忤勿以綺羅貴而謂絲麻賤勿以
便辟親而可踈忠彥徒靡磨鈍資見此金百鍊愀然拜
祠下誰能媿纓弁

草堂與諸生二首

吾愛秋日佳蕭然適我懷良朋日相覲衆芳未云衰朱
光覃霧澤綠水間雲涯中塘集鳬鴈接翼鳴喈喈蜻蜒

振其羽翮飛亦徘徊物色每如此會盍何當乖九罍得
魴鯉薄言同舉杯雖無鐘石奏意志中自諧巢居託松
栢遲莫猶能來

采菊登高岡崎嶇行苦饑顧見阪田中粲粲金滿枝芳
馨不在遠中心胡乃遺緬懷王子喬棄俗乘雲螭寄言
青鸞鳥瑤華杳難期蹠實會有程排虛非所知縣圃不
可即僊夫誠已希白榆何歷歷無根自相依霄地礮然
石乃為人所啗

喜晴四首

解纓息塵駕復此園田居昊穹靳白日后土成沮如今
晨雨初霽良懷浩然舒玄蟬鳴灌木高鴻凌太虛飄風
卷蓬藿奇岑映吾廬揮杯適真性行歌隨所如

離離原上苗混混隨流波久無持祿資所望良已多農
人速吾駕及此風日和南疇理荒蕪勞者相與歌間關
林中鳥窈窕陌上華生態足娛悅豈憚重荷鋤

散步衡茅下萬木環芳洲白鷺矯其羽清飈送回流云

何雨無正雅違林與邱肅肅天界澄泱泱川潢收庶物
露其生景風亦和柔及辰盍朋好濁醪相勸酬清言間
長謠冥會臻神幽巍巍紫芝翁千載相為謀緬彼商山
時為樂有此不委形宇宙內縱浪將焉求

端居撫靈化流幻成陰晴晨雞奏天色起覺衾裯輕藩
籬未云樹溪壑浩已盈抱獨有餘豫焉知世上情邂逅
適所願丹葵耀其英摇摇庭綠中有鳥時一鳴物色每
如此聊以觀我生

贈郭循夫北上

天池集高鳳炎嶠起潛蚪君子崇令德及時建芳猷
壁乃天損閉關非世求修名如有立千載揚姱修茲行
壽親闡明將覲宸旒壯志麗陽春健翮凌素秋出宿珠
海湄弭棹龍江流塞予愧德鄰坎壈栖滄洲念子清廟
姿溫溫古天球赤手扶天步丹心開聖謀仗劔自茲別
吾道何悠悠

泰泉紀遊次京兆陳公韻

飛蓋龍丘陽投轄鶴臺陰泰泉閱真源乘秋可高尋烟
蘿開野酌寒翠生衣襟采蒲歷窈窕懷菊經崎嶇安期
與崔公千載同素心雲螭一以駕碧山苔蘚深松風如
有情颼颼瑶華音因之撫元化庶以求吾忱於穆諒在
茲魚鳥自飛沉晤言得真筌萬象居然森白駒倏難繫
竚望空遥岑

春郊感興

升彼青門墟縣縣生之仄策馬者誰子容輝閑且都揚

鑣不相顧我且芸荷鋤但使固根蒂寧無以為家姚冶
人所羨沉冥道為徒漂搖不可食嘆息林中花

冬日與子乾惟鑒兄弟遊泰泉訪鶴舒臺

天池集南翼帝車迴北衡芳草寒未歇潦川憺猶清晏
陰日夕起鬱抱何由平朔風肅徂軫陟雲延友生周遭
度玄渚紆徐寥落英晨霞散餘絢儻忽凌虛明虬松移
翠葆虹澗流金聲轅馬何蕭蕭谷鳥亦嚶嚶蘊真效龍
躩撫化忘將迎隆墀一永歎遠壑浩自盈緬惟遼海鶴

載彼瑤臺笙邈矣安期子迺垂千載名

草堂踏月二首

飛鞅登古臺抱膝睎天路紫薇何蒼蒼元化莽回互陽
鳥來不息江南正霜露飄風振虛壑海濤自吞吐世塗
渺無端玉衡有常度儼焉懷古今行歌寫衷素

逍遙水上鷺倏忽雲中翔阜蟲躍衰草亦知明月光群
動夜不息元天函百昌二蟲何為爾高下自有常縱浪
大化中洪濤浩茫茫自非松柏姿日夕焜以黃慨彼風

中葉悠悠安所將

秋懷

瑟瑟陵上松琅琅峽中泉迴風相遇合淒清成管絃端
居撫時運閔默何由宣野廬盡縣磬飛輓猶開邊初月
張虛弓流火無炊烟明河不可觴白榆不為錢吾民亦
勞止昊天胡乃然

陳京兆浮丘心遠亭分得落字

浮丘倚蘭渚鬱水環山郭中流結衡宇炎歊盡銷落伊

人天與游委懷合冲漠投簪隱朝市縹組尹京洛卷舒
貴自我虞羅豈云獲丘隅協鳥性濠梁遂魚樂脩然馳
寸心萬古紛迴薄高雲映樽俎涼雨灑葵藿陶情良在
茲撫物欣有託願為鴻與鵠相將翔寥廓

三窮圖詩九首為周侍御同年

縫裳須用鍼絳瑟須鳴琴芳年纔十七與君結同心譬
彼梧桐枝萋萋倚雲岑豈知雙鸞曲翻成孤鵠吟幽燈
照總帷悽惻誰能禁

芙蓉含早霜亭亭立清沚中雖懷苦心所幸有蓮子結
根徹黃泉不惜為君死撫膺顧遺腹一脉尚存此雌雄
嗟未分血淚徒盈眚

逝水無迴波斷髮不返根燕好甫三載音容俄九原高
堂有舅姑誰與供晨昏懸弧倘不遂妾身安用存慟哭
視蒼天悠悠竟何言

力田終有獲績紡終成布誰言邁種德一絕如零露越
月兼逾旬祥駒自天驚尊嫜驚且喜風骨儼如父提携

方在茲陟岵增懷慕

衡茅勿云鄙闔門當見天孩提勿云小宗祏當綿延彌
月拜舅姑縞素登堂前嗟哉老無子仗爾娛暮年爾孤
不識父呱呱淚如泉

縣縣孤生徙子母相鈎帶旦夕勤護持懼為風雪害周
宗已磐石孟母猶教誡烏啼書幌月鳴機答虛籟旌弓
方駢駢奮志從此邁

霜蹄肅皇路雲翼騰天池旭日送檐鵲秋風飄桂枝慄

慄未亡人幸此光榮時驅車向京洛賓興有程期山川
曼悠悠離憂良在茲

北堂有慈竹孫枝凌雲起孤兒復抱子蘭階映瑤珥四
世萃一門九原聞亦喜割鮮開錦席犀錢一何綺沉憂
天所釋樹護乃徒爾

赤霄坦如坻驄馬高騰驤顧見風中木悵悵猶慘傷絨
情達楓陛鸞鳳森翱翔巍哉表宅里恩渥光泉鄉我矢
三窮詩天道固有常

李番出席上賦

兔絲依松栢引蔓凌雲天文明席佳會彈冠懷昔年邵
生圭組時寧知在瓜田陳力審所就周任有遺言弛張
道所貴辟彼望與弦華筵有明牧飛觥羅豆遵坎坎鼓
干舞矯矯成飛鸞醉來命駕起斗柄隨車還浮雲翳金
樞望舒悶復宣曲肱謝鞶帶皎日當盈前卷舒合龍護
庶以道自全解憂適真性杜康無乃賢

新秋登玄覽臺分韻得峰字

高臺臨萬峰陸海開芙蓉玩弄忘日夕涼翠生心胸載
酒步雲壑豪客紛來從是時秋序肅天空鴈噉噉蘿月
掛霜鏡楓江馳玉龍醉來藉瑤草爲外聞煙鐘振衣劃
然嘯鸞聲落長松懸知千載後懷吾霞上蹤

郭中丞半隱園迎春雅集

振羽擇芑木育鱗資澄淵豈知歷臺館歛焉接林泉蒼
郊迓春序元圃敞瓊筵結構崇雅朴高情屬雲天環亭
列翠陌鑿沼引璿源飛觴坐秩秩曲水聞涓涓令嚴榛

莽闢仁鋪桃李妍壯節挺松竹芳猷播蘭荃秋風動櫺
箔秀色通漪漣養素成半隱忘言飛泳間祥鶴仰迢遞
賀燕來連翩蹇予諧夙尚臨眺心悠然

紫雲觀易臺為薛吏部題

鳴鶴振遠臯潛龍耀靈淵懿彼廬山曲栖茲高蹈賢紫
雲結蘭若孤峰靄壚煙築臺踞幽勝迎風概中天旣旒
衿珮集瑣瑣珪符捐觀易研衆妙洗心由浩然開軒丹
嶽入承宇青霞連編韋會至願舍愁成真筌雖生姬孔

後已悟羲皇前彙征謝嘉遁道以時屢遷垂光虹蜺上
永懷邱壑年

泰泉集卷四